

Naalakkersuisut Atuarfik pillugu Inatsisartut inatsisissaat nr. 15, 3. december 2012imeersup kingornalu inatsimmut ilanngunneqarsimasinnaasunut atatillugu atuuttumut nalunaarummut Meeqqat atuarfianni immikkut ittumik atuartitsisarneq aammalu allamik immikkut perorsaanikkut ikiorsiisarneq pillugu Namminersornerullutik Oqartussat nalunaarutaat nr. 22, 23. juli 1998-imeersumut tulluussaaqqinneqarnissamik peqquneqarnissaannik Inatsisartut aalajangiiffigisassaattut siunnersuut
(Inatsisartunut ilaasortaq Debora Kleist, Inuit Ataqatigiit)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Aappassaaneerinninneq

Naalakkersuisut qutsavigissavaat Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap suliaa isumaliutissiissutaalu pillugit.

Naalakkersuisut ataatsimiititaliap isumaliutissiissutaa tusaatissatut tiguaat.

Ataatsimiititaliap isumaliutissiissummini apeqquteqarfigisimavai ilinniartitsisut, Naalakkersuisunut akeqquneqartut siunnersuutip aappassaaneerneqarneranut atatillugu.

Ataatsimiititaliap siullertut kissaatigaa ilisimatitsissutigeqqullugu ilinniartitsisut qassit atuarfik pillugu inatsimmi piginnaasanut tunngatillugu piumasaqaatinik naammassinninersut. Tamatumunnga tunngatillugu ilisimatitsissutigissavara ukiumi atuarfiusumi 2016/17-imi ilinniartitsisut 13-iummata atuarfimmi, immikkut ilinniartitsinermut sammiveqartumik ilinniagaqarsimasut. Paasissutissanik aallanik nalunaarsugaasunik soqannigilaq ilinniartitsisut allatigut piginnaasassanik pisariaqartunik immikkut atuartitsinissamut peqalersimasinnaasut pillugit.

Ataatsimiititaliallu ilanngullugu aamma paasissutissiissutigeqquaa ilinniartitsisut pineqartut piginnaasallit qassit ilinniagaqarsimanersut / pikkorissaqqissimanersut, atuarfik pillugu inatsimmi piumasaqaatit taakkua 2012-imi aalajangersarneqarnerisa kingorna. Tamatumunnga ilisimatitsissutigineqassaaq ilinniartitsisunngorniartut ilinniartitaanermi 2006-imiit ilinniartitsisunngorniartut immikkut atuartitsisarnermut atatillugu ilisimasassanik tunngaviusunik ilinniartinneqartarmata. 2014-imi pilersinneqarpoq ilinniartitsissut annerusumik sammisassaq, perorsaanikkut immikkut ingerlatsinermi Ilinniarnermut

Instituttimi. 2017 ilinniagaqartut 9-it naammassipput ilinniartitsisunnigorniarnermi ilinniartitsissutini annerusumik sammisassani immikkut perorsaanermik ingerlatsinermi ilinniagallit. Ilinniarnermik Institutip naatsorsuutigaa 2018-imi 16-inik ilinniagaqartoqarnissaa kiisalu 2019-imi 25-inik. Taakkua saniatigut Ilinniarnermut Instituttimi pilersinneqarnikuuvoq perorsaanermik immikkut ilinniartitaaneq diplom-ertalik, qulinik ilinniartoqartoq, ilinniagarlu taanna 30 ECTS-point-inik annertussuseqarluni.

Ataatsimiititaliallu aamma kissaatigaa paasissutissiisoqassasoq qanoq Naalakkersuisut sulissutiginiarneraat qularnaarneqassasoq kommunini piviusunik tunngavilimmik ilinniartussarsiortoqartassanersoq, piginnaasanik kissaatigineqartunik peqartunik. Tamatumunnga tunngatillugu ilisimatitsissutigineqassaaq, Ilinniarnermut Instituttip ilinniartitsisut ingerlaqqiffiusumik ilinniagaqartarnerannut ilinniaqqittarnerannullu akisussaasusup, maanna suliarimmagu ilinniartitsisunnigorniartarnerup nutarterneqarnissaanut siunnersuut, immikkut perorsaanikkut ingerlatsineq ilinniartitsisunnigorniartarnermi qitiusumik inissisimasussanngorlugu aqqissuussaasusaaq, fagip annertunerulersinneqarneranik ECTS point-inik pingasuniit qulinut naleqartumik. Tamanna isumaqassaaq ilinniartitsisut tamarmik siunissami suliassaqarfimminni piginnaanernik amerlanerusunik peqartalerumaartut. Ilinniarnermut Institutti ilanngullugu ilisimatitsivoq piffissap ingerlanerani aamma neqeroorutaalerumaartut fagit ilinniartitsissutissat ataasiakkaat, imaluunniit immikkut perorsaanikkut ilinniartitsineq diplom-ertalimmik naammassineqartartoq.

Tamatumalu saniatigut Ilinniartitaanernut Aqutsisoqarfiup pikkorissaasarnernut periusissiatik nutaaq naapertorlugu kommunit ingerlaavartumik attavigisarniarpaat, tamatumani aamma PPR/MISI, taakkua ilinniartitsisut sulisorineqartut pikkorissaqqittarnernik pisariaqartitsisarneri eqqarsaatigalugit, atuartunik immikkut atuartitsinermi pisariaqartitsisartunut sammisuni.

Ataatsimiititaliaq allannguutissatut siunnersuummik saqqummiussaqqarpoq, erseqqissaasumik nalunaarut suliareqqitaq nalunaarutigineqassasoq kingusinnerpaamik 1. januar 2018. Naatsorsuutigineqarpoq nalunaarut akuersissutigineqarsinnaassasoq sapaatip akunnerata tulliata ingerlanerani, atortuulersillugulu taamaasilluni tamatuma kinguninngua nalunaarutigineqarsinnaassalluni.

Taamatut oqaaseqarluta Naalakkersuisut inassutigissavaat ataatsimiititaliamit allannguutissatut siunnersuutaasut akuersissutigineqassasut.